

Sokatira ♦ Nuarbe Suitzako Stans herrian da, maila handia duen nazioarteko torneo batean esku hartzeko

Nazioarteko lehia, maila neurtzeko

Iaz Nuarbek irabazi egin zion Stans-i 600etan, eta bigarren izan zen 640etan

Koldo Alduntzin / Donostia

◀ NUARBEBERRIRO Suitzara jo du, Stans-eko Nazioarteko Torneoa jokatzeko. Iaz 20. urteurrena ospatu zuten nuarbetarrek, eta hori zela eta, suitzarren gonbita jaso zuten. Gipuzkoarrek oso jardun eta emaitza onak lortu zituzten iaz, eta horregatik, aurtan ere gonbita egin diete. Nolanahi ere, Nuarbek ederki erakutsia du lehen ere nolako taldea den. Stans eta Felton (Ing.) urtarrilean izan ziren Beasainen, eta Nuarbek irabazi egin zien. Gero, Euskadiko Sei Orduetan berriro irabazi zion Nuarbek Feltoni.

Euskal Herriko bigarren taderik arituena da Nuarbe, Mutrikuren ostean. Stans hala ere, Nuarbe baino bost urte helduagoa da. Gipuzkoarrek orain dela 16 urte bisitatu zuten Stans lehenengoz, eta esperientzia gogorra ukan zuten, batez ere eskuekin, hasiberriak baitziren. Herenegun gauean irten ziren nuarbetarrak autobusez, eta mila kilometro egin ondoren atzo eguerdian iritsi ziren.

Gaur 600 kiloetako lehia izango da, eta astelehenean —han jaieguna— 640 kiloe-takoa. Iaz 25 talde aritu ziren pisurik arinenean, eta Nuarbek irabazi zuen, finalean Stans menderatuta. 640etan 33 talde lehiatu ziren, eta gipuzkoarrek bigarren postua eskuratu zuen. Finalean Holandako Bisonek irabazi zion kitarakoa jokatu.

Iazko Munduko Txapelketan urrezko domina kolkoratu zuen Nuarbek 560 kiloe-tan eta 4. izan zen 640etan. Alemania, Ingalaterra, Lituania, Holanda, Kanada, Suedia, Suitza, Italia eta Irlandako taldeak izango ditu kontrario Nuarbek Stans-en.

Gaztedi ez da ariko Euskal Herrikoan

Aurtengo Euskal Herriko Txapelketa larunbatean hasiko da Nuarben. Soilik gizonetzkoen txapelketa jokatuko da, eta horretan ere, talde garrantzitsu bat faltakoa da: Laukizko Gaztedi. Beraz, Getxok, Mutrikuk, Nuarbek eta Goierriek jardungo dute.



PABLO S. QUIZA

Nuarbek Euskadiko Sei Orduetan egin zuen azken agerraldia, eta garaipena lortu zuen Ingalaterraren kontra.

Aizkora ♦ Urrezko Aizkoran, 3. posturako lehia

Mindegia eta Nazabal aurrez aurre berriro

Koldo Alduntzin / Donostia

◀ FINAL handiaren atarikoa egingo dute Miel Mindegia eta Floren Nazabalek bihar, Mendatan (Bizkaia). Urrezko Aizkoraren hirugarren postua lortzeko neurketa izango dute (12:30). Nazabal Larretxearen ordeaz ariko da, Arantzakoak eskuko hatz txikiko tendoiak hautsi baitzituen belarra ebakitzen ari zela.

Hain zuzen ere, Mindegia azken kanporaketan kanporatu zuen Nazabal, 55 segundoko aldea aterata. Proba osoan aritu zen Mindegia aurretik. Orduan bezala, 10 enbor ebaki beharko dituzte, baina lau kanaerdikoen ordeaz bi izango dituzte, eta 60 ontzako lau —orduan bi izan zituzten—. Horiez gain, 45 ontzako bi eta kanaerdiko bi.

Mindegia 45 ontzakoak eta 60koak plazaratuko ditu. Hain zuzen, elkarren kontrako kanporaketan Nazabal hobeto moldatu zen 60 ontzakoetan. Egurrei buruz, Mindegia zioen: «Floren oso ongi moldatzen da egur gozoetan».

Ezkurakoak fibretako arazoak ditu zangoan, eta horrek gerrian eragin omen zion. «Halere, 3. postua nahi dut, saria ere erakargarria baita». Garaileak 300.000 pezeta jasoko ditu eta galtzaileak 200.000 pezeta.

Nazabalek lau kanporaketa jokatu zituen —Mindegia kontra apirilaren 25ean jokatu zuen— eta aski erakutsi du nolako aizkolaria den eta nola prestatuta dagoen. Ikusi beharko da motibazioz nola heldu den; saria bederen, ongi aritzeko modukoa da.